

SEPPA contento cu e producto final cu a resulta di Dialogo Social

ORANJESTAD (AAN) – Tin hende ta sinti cu e peso financiero di gobierno ta debi na ahuste di salario y beneficionan cu ambtenaarnan ta ricibi, manera e.o. indexing.

Den entrevista cu sra. Magaly Brito, Secretario General di SEPPA, DIARIO a haci e pregunta al respecto.

E dama sindicalista a expresa cu nan a ripara riba cifranan di e cuentanan anual di gobierno, cu enberdad tabata tin un aumento pero mester wak e realidad for di otro angulo. El a subraya cu gobiernonan pa hopi aña tabata tin un in-

haalslag hopi grandi, di basta tempo, y tin cosnan cu a keda pega y esaki a haci cu pagonan a tuma lugar mientras tanto y por a mira e efecto.

Sra. Brito a expresa cu no necesariamente ta e indexing pasobra esaki ta un porcentahe abao. Locual e sindicato a lucha pe na aña 2008 cu ta e inhaalmanoeuvre, esaki mes no a wordo paga ainda.

Magaly Brito a señala cu por mira den cifranan aworaki cu tin un deflacion tambe, cu ta indica cu indexing por wanta un rato, pero e inhaal-

manoeuvre mester bin na discusion y despues di e pagonan retroactivo cu a tuma lugar, unda hopi hende a haya “back pay”, lo bay mira otro cifranan financiero.

Sra. Brito, den e cuadro di promocionnan, a indica cu ultimo temponan SEPPA tabata tin reunion cu departamento di recursonan humano, cu por tin atraso pa contesta empleadonan publico di tres pa cuater luna, pero poco, poco nan ta bay haci esey menos, compara cu un par di aña pasa cu tabata tin hopi critica cu cartanan no tabata

wordo contesta, algun empleado publico mester a bay Corte pa busca nan derechonan, locual a crea frustracion tambe.

Sra. Brito a subraya cu e añanan aki, y danki tambe na un discusion cu tabata tin den dialogo social, a mostra e minister cu situacionnan asina aki no por y a traha riba esey.

E dama a menciona cu awo-raki e departamento di recurso humano di gobierno ta funciona hopi bon mes y tin plannan pa futuro pa sigui mehora, y esey ta bay yuda

bastante pa por mantene un situacion mas real.

El a subraya cu awor e empleadonan publico ta recuperando cosnan cu a keda atras e añanan anterior, y esey ta pone un peso awor pero den futuro lo tin un mehor bista. Bolbiendo na e resultado di dialogo social e añanan aki sra. Brito a señala cu esaki a trece puntonan importante cu e sindicatonan mes a pidi pe, manera e pension general pa e sector priva, y poco, poco ta trahando riba dje.

Den e dialogonan bilateral entre gobierno y sindicatonan publico tin basta aspecto cu nan a keda contento cu nan, pero ta e participacion en general cu locual e gremionan ta satisfecho cune, y tin basta aspecto cu a toca comunidad y cu SEPPA ta contento di a forma parti di dje, y na final a sali cu un bon producto. El a reitera cu dialogo no ta pa e partidonan sali completamente gana, pero pa mira un parti di nan puntonan bira decision y wak nan den e producto final.